

## CONVENIO DE COLABORACIÓN ENTRE AUGAS DE GALICIA E O CONCELLO DE OROSO POLO QUE SE SUBVENCIONAN AS OBRAS NECESARIAS PARA RENOVAR A REDE DE ABASTECIMENTO E SANEAMENTO DENTRO DO PROXECTO DE REMODELACIÓN DA AVENIDA DE GARABANXA. OROSO (A CORUÑA)

Dunha parte, Ángeles Vázquez Mejuto, conselleira de Medio Ambiente e Cambio Climático, nomeada polo Decreto 44/2024, do 14 de abril, en nome e representación da entidade pública empresarial Augas de Galicia, no exercicio das funcións atribuídas polos artigos 13 da Lei 9/2010, do 4 de novembro, de augas de Galicia e 6 do Estatuto da entidade pública empresarial Augas de Galicia, aprobado polo Decreto 32/2012, do 12 de xaneiro.

Doutra parte, Alexander Doval Expósito, alcalde do Concello de Orosa, no exercicio das atribucións conferidas no artigo 21 da Lei 7/1985, do 2 de abril, reguladora das Bases do Réxime Local.

### EXPOÑEN

**Primeiro.** O Concello de Orosa ten atribuídas competencias en materia de saneamento e abastecemento de auga potable, en base á Lei 7/1985, do 2 de abril, reguladora das Bases do Réxime Local, que nos seus artigos 25.2 c), 26.1 a) e 86.2, configura o saneamento e a depuración de augas residuais como un servizo de competencia local, nos termos establecidos pola lexislación da Comunidade Autónoma.

Neste senso, o artigo 80.2 l) da Lei 5/1997, do 22 de xullo, reguladora da Administración local de Galicia, sinala como competencia atribuída ás entidades locais o tratamento de augas residuais, delimitando a Lei 9/2010, do 4 de novembro, de augas de Galicia o reparto competencial neste eido, resultando competencia das



entidades locais, en materia de execución de obras, as que teñan por obxecto a rede de sumidoiros (artigo 5.1 b)), redes de distribución (artigo 27.2 c)), a execución de calquera obra no eido do saneamento e/ou a depuración que non teña sido declarada de interese público por algún dos medios do artigo 28 da Lei 9/2010, do 4 de novembro, de augas de Galicia (artigos 27.2 a)) en relación co artigo 5.1 c)).

Ademais, en materia de prestación do servizo, atribúese competencia ás entidades locais para a prestación do servizo respecto de instalacións non comprendidas no artigo 32 da Lei 9/2010, do 4 de novembro, de augas de Galicia, e respecto daquelas instalacións das que non se solicite a súa asunción do servizo pola Xunta de Galicia de acordo co establecido na disposición transitoria quinta (artigo 5.1.c)).

Asemade, os artigos 5.1 a) e 27.1 da citada lei de augas de Galicia, establecen como competencia das entidades locais o servizo de abastecemento domiciliario de auga potable e o seu control sanitario. Ademais, o artigo 27.2 establece a competencia das entidades locais en materia de elaboración e aprobación de proxectos de obras e execución de infraestruturas cando se trate de obras da súa competencia así como a explotación dos servizos da súa competencia.

**Segundo.** A entidade pública Augas de Galicia, creada pola Lei 9/2010, do 4 de novembro, de augas de Galicia e regulada polo Decreto 32/2012, do 12 de xaneiro, polo que se aproba o seu estatuto é unha entidade pública empresarial do sector público autonómico de Galicia, adscrita á Consellería de Medio Ambiente e Cambio Climático, con personalidade xurídica propia e plena capacidade de obrar para o cumprimento dos seus fins, e constitúe o medio, xunto co resto de órganos que integran a Administración hidráulica de Galicia, a través do cal a Comunidade Autónoma de Galicia exerce as súas competencias en materia de augas e obras hidráulicas.



Entre estas competencias atópanse, con carácter xeral, e de acordo co establecido na Lei 9/2010, do 4 de novembro, de augas de Galicia, a ordenación administrativa e a planificación das obras hidráulicas non declaradas de interese xeral (artigo 4.1 a)) e, de xeito concreto, no ámbito do saneamento e a depuración, correspóndelle a ordenación dos servizos de saneamento en alta (artigo 11.5 a)) e a elaboración dos criterios de coordinación das actuacións das entidades locais (artigo 11.5 b) e 26.2d)), entre outras. E, no ámbito do abastecemento, a adopción de medidas que garantan o abastecemento aos municipios (artigo 31.1) e a supervisión das redes básicas de abastecemento en alta (artigo 31). En calquera caso, as competencias da Comunidade Autónoma de Galicia exerceranse sempre de conformidade co principio de garantía e eficacia do servizo público de abastecemento (artigo 3.1 f)).

**Terceiro.** O artigo 57 da Lei 7/1985, de 2 de abril, e o artigo 194 da Lei 5/1997, do 22 de xullo, determinan que a cooperación económica, técnica e administrativa entre a Administración Local e as Administracións do Estado e das Comunidades Autónomas, tanto en servizos locais como en asuntos de interese común, desenvolverase con carácter voluntario, baixo as formas e nos termos previstos nas leis, podendo ter lugar, en todo caso, mediante os convenios administrativos que subscriban.

**Cuarto.** O Concello de Oroso precisa realizar obras para a remodelación das beirarrúas da avenida de Garabanxa. As actuacións necesarias para a remodelación desta avenida afectan a varios servizos urbanos, entre eles, a rede de abastecemento e saneamento.

Para a execución das obras referidas o Concello de Oroso solicitou a colaboración da Deputación Provincial da Coruña, mediante a formalización dun convenio no que se instrumente unha encomenda para a contratación e a execución das obras do proxecto "Remodelación na Avenida da Garabanxa", que inclúe a execución das obras de remodelación das beirarrúas e a renovación da rede de abastecemento e saneamento na avenida da Garabanxa.



Con base no referido convenio a Deputación Provincial da Coruña levará a cabo as actuacións consistentes na contratación das obras, dirección, coordinación da seguridade, control de calidade e a xestión das obras ata completar a súa finalización.

En canto os custos das actuacións, a Deputación Provincial da Coruña financiará a execución da remodelación das beirarrúas da avenida da Garabanxa e o concello de Oroso as actuacións de renovación da rede de abastecemento e saneamento.

**Quinto.** Á vista do exposto, as partes consideran necesario establecer unha fórmula coordinada para garantir o financiamento da citada actuación e establecer as condicións da subvención directa outorgada ao concello de Oroso.

Sobre a base do ata aquí exposto, as partes acordan outorgar o presente convenio de colaboración de acordo coas seguintes:

## **CLÁUSULAS**

### **PRIMEIRA. OBXECTO**

É obxecto deste convenio establecer as condicións básicas para a colaboración entre Augas de Galicia e o Concello de Oroso que permitan ao concello acometer e incorporar ao patrimonio público municipal as obras necesarias para renovar a rede de abastecemento e saneamento da Avenida de Garabanxa, a súa explotación e a súa conservación e mantemento, nos termos establecidos nas cláusulas seguintes.

### **SEGUNDA. OBRIGAS DAS PARTES**

Para o cumprimento do obxecto deste convenio:

1. Augas de Galicia obrígase a asumir as obrigas económicas derivadas deste convenio achegando ao concello un importe máximo de douscentos sesenta e oito mil cento dez euros con oitenta céntimos (268.110,80 €).



## 2. O Concello de Oroso obrígase a:

- Levar a cabo as actuacións oportunas para a execución do Proxecto da obra denominado "Remodelación na avenida da Garabanxa".  
As actuacións referidas poderán ser realizadas coa colaboración técnica e financeira da Deputación Provincial da Coruña.
- Realizar ante Augas de Galicia a correspondente rendición da conta xustificativa do cumprimento das condicións e consecución dos obxectivos da subvención, do xeito establecido neste convenio.
- Proporcionar a Augas de Galicia todos os datos necesarios para o seguimento dos indicadores de cumprimento do Plan estratéxico de Galicia 2022-2030.
- Dar a adecuada publicidade do carácter público do financiamento das actuacións obxecto da subvención de acordo co establecido no artigo 15.3 da Lei 9/2007, do 13 de xuño, de subvencións de Galicia.

Nos medios de difusión utilizados deberá figurar expresamente o importe total das actuacións e a achega financiada por Augas de Galicia, debendo estarse ao establecido no artigo 20.1 do Regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro.

## TERCEIRA. RÉXIME DE FINANCIAMENTO

O custo total das actuacións do proxecto de obra denominado "Remodelación na avenida de Garabanxa" ascenden a oitocentos noventa e seis mil cento corenta e tres euros con sesenta e cinco céntimos (896.143,65 €).



Augas de Galicia financiará os gastos relativos á renovación da rede de abastecemento e saneamento da Avenida de Garabanxa do Concello de Oroso do proxecto denominado "Remodelación na avenida de Garabanxa", que ascenden a douscentos sesenta e oito mil cento dez euros con oitenta céntimos (268.110,80 €).

Augas de Galicia non financiará os gastos relativos a coordinación de seguridade e saúde e control da calidade da renovación da rede de abastecemento e saneamento da Avenida da Garabanxa.

Augas de Galicia financiará a súa achega con cargo á conta 6566 "Subvencións de capital. A corporacións locais" do Plan Xeral de Contabilidade Pública de Galicia, na anualidade 2025.

#### **CUARTA. LIBRAMENTO DOS FONDOS E RÉXIME DE XUSTIFICACIÓN**

En canto ao réxime de xustificación, o concello debe presentar ante Augas de Galicia, antes do 1 de decembro de 2025, a documentación establecida no artigo 10 do Decreto 193/2011, do 6 de outubro, polo que se regulan especialidades nas subvencións ás entidades locais galegas.

Ademais o concello obrígase a:

- a. Achegar un informe de xustificación e execución dos traballos que inclúa fotografías deles, no que se reflicta o estado antes do inicio, durante a execución e unha vez finalizada a obra.
- b. Achegar as certificacións das obras e as facturas correspondentes.

As facturas e as certificacións das obras serán expedidas a nome da Deputación Provincial da Coruña ao ter encomendada esta entidade a contratación e execución das obras obxecto deste convenio.

- c. Deberá achegar o documento de recepción da obra por parte do concello no prazo de dous meses dende a súa finalización.



- d. Achegar a certificación da intervención ou do órgano que teña atribuídas as facultades de control da toma de razón en contabilidade e, no caso do último pago, do cumprimento da finalidade para a que foi concedida, de acordo co establecido no artigo 8 do Decreto 193/2011, do 6 de outubro, polo que se regulan especialidades nas subvencións ás entidades locais galegas.
- e. Facilitar, se fose o caso, toda a documentación que requira a Intervención da Comunidade Autónoma, o Tribunal de Contas e o Consello de Contas de Galicia, no exercicio das súas funcións de fiscalización e control do destino das axudas obxecto deste acordo.
- f. Comunicar a Augas de Galicia, se fose o caso, as alteracións nas condicións tidas en conta para a concesión da subvención obxecto do presente convenio e, en todo caso, a obtención concorrente de subvencións ou axudas outorgadas por outras administracións, entes públicos ou privados, nacionais ou internacionais aos efectos de propoñer, se procedera, a modificación das condicións establecidas neste convenio.
- g. Reintegrar a Augas de Galicia, de acordo co artigo 33 da Lei 9/2007, do 13 de xuño, de subvencións de Galicia, a cantidade total ou parcial da axuda establecida, e dos xuros de demora devindicados dende o momento do seu pagamento, para o caso de incumprimento das condicións nel establecidas.
- h. Asumir, pola súa consideración de beneficiario segundo o artigo 11 da Lei 9/2007, do 13 de xuño, todas as obrigas que, para o mesmo, establece o citado artigo.
- i. Acreditar documentalmente a efectividade dos pagamentos realizados no prazo máximo de sesenta días naturais contados a partir da data do ingreso na conta bancaria da beneficiaria de cada un dos aboamentos da subvención concedida, de acordo co establecido no artigo 3 do Decreto 193/2011, do 6 de outubro, polo que se regulan especialidades nas subvencións ás entidades locais galegas.



En canto aos prazos e modos de pagamento da subvención por parte de Augas de Galicia, a súa achega materializarase mediante a transferencia dos fondos precisos ao concello, no prazo dun mes desde a presentación da rendición da conta xustificativa antes mencionada, conforme ao estipulado neste convenio e na lexislación aplicable. A anterior transferencia de fondos, será ingresada na conta bancaria da que o concello sexa titular, cuxa numeración facilitará a tal fin a Augas de Galicia.

A achega de Augas de Galicia é dun importe máximo, que será minorado de xeito proporcional a posibles baixas na execución das actuacións, tendo en conta as porcentaxes de cofinanciamento recollidas no detalle das achegas de Augas de Galicia conforme a desagregación dos gastos do proxecto e que se recollen no anexo I.

Será de aplicación o disposto na Lei 9/2007, do 13 de xuño, de subvencións de Galicia e no seu regulamento de desenvolvemento, aprobado polo Decreto 11/2009, do 8 de xaneiro e no Decreto 193/2011, do 6 de outubro, polo que se regulan especialidades nas subvencións ás entidades locais galegas.

A concesión da subvención obxecto deste convenio queda supeditada ao cumprimento da normativa vixente. Neses termos, será compatible con calesquera outras axudas públicas ou privadas pero, en ningún caso, poderá superar os límites máximos de intensidade de axuda establecidos na normativa da Unión Europea.

De conformidade co disposto no artigo 62 do Regulamento de subvencións de Galicia, aprobado polo Decreto 11/2009, do 8 de xaneiro, prevese a posibilidade de que Augas de Galicia realice, sen necesidade de que o concello constitúa garantía, pagos a conta por contía equivalente á xustificación presentada de ata o 100% do gasto subvencionado.



## QUINTA. RELACIÓN LABORAL

A subscrición deste convenio non implica relación laboral, contractual ou de calquera tipo, entre os profesionais que desenvolvan as actividades e a entidade pública empresarial Augas de Galicia, de tal xeito que non se lle poderá esixir responsabilidade ningunha, nin directa, nin subsidiaria, polos actos ou feitos ocorridos no desenvolvemento deste.

## SEXTA. COMISIÓN DE SEGUIMIENTO

Constituirase, a iniciativa de calquera das partes, unha comisión formada por dous representantes de Augas de Galicia e outros dous representantes do concello para desenvolver as seguintes actuacións:

- Impulsar e avaliar o cumprimento deste convenio, propoñendo as actuacións que se consideren precisas.
- Interpretar, en caso de dúbida, o contido do convenio.
- Propoñer ás partes a resolución das posibles controversias que puideran xurdir na aplicación do convenio.

Actuará como presidente un dos representantes de Augas de Galicia, con voto de calidade.

Esta comisión reunirse as veces que se estimen oportunas para o cumprimento do convenio.

Os membros desta comisión de seguimento poderán asistir ás reunións desta acompañados do persoal técnico que consideren oportuno. Ademais, cando se considere oportuno, a Comisión de Seguimento poderá requirir a asistencia técnica necesaria para a avaliación e análise das distintas cuestións sobre as que deban adoptarse acordos.



## **SÉTIMA. NATUREZA DO CONVENIO**

Este convenio de colaboración ten natureza administrativa, rexendo na súa interpretación e desenvolvemento o ordenamento xurídico-administrativo.

Todo litixio, controversia ou reclamación resultantes deste Convenio ou relativo a este, a súa interpretación ou execución, o seu incumprimento, resolución ou nulidade, resolverase pola xurisdición contencioso-administrativa.

## **OITAVA. VIXENCIA DO CONVENIO**

Este convenio terá efectos dende o día seguinte ao da súa sinatura, sendo de aplicación aos gastos realizados dende o 1 de xaneiro de 2025, e estenderá a súa vixencia ata o 31 de decembro de 2026. Porén, seguirá producindo efectos en tanto se manteñan as obrigas pendentes de cada unha das partes recollidas neste convenio.

## **NOVENA. MODIFICACIÓN DO CONVENIO**

Calquera modificación no contido deste convenio, requirirá acordo entre Augas de Galicia e o concello e tramitarase a través dunha addenda ao convenio.

## **DÉCIMA. EXTINCIÓN DO CONVENIO**

Será causa de extinción automática do convenio:

- o cumprimento do seu obxecto
- o transcurso do seu prazo de vixencia

Ese convenio tamén poderá extinguirse por incorrer nalgunha das seguintes causas de resolución:

- o mutuo acordo entre as partes asinantes
- a inviabilidade da realización das actuacións descritas neste convenio, por causas non imputables ás partes



- a inviabilidade financeira da actuación como consecuencia de atrasos na licitación e/ou adxudicación das actuacións.

A resolución con causa nalgún dos supostos anteriores non levará asociada indemnización a ningunha das partes.

## **UNDÉCIMA. PUBLICIDADE**

A sinatura deste convenio suporá o consentimento expreso das partes asinantes para incluír e facer públicos os datos persoais que consten no convenio, e mailo resto de especificacións contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno e o Decreto 126/2006, do 20 de xullo, polo que se regula o rexistro de convenios da Xunta de Galicia.

## **DUODÉCIMA. MEDIDAS ANTIFRAUDE**

1. É de aplicación a este convenio o Plan específico de prevención de riscos de xestión e medidas antifraude da entidade pública empresarial Augas de Galicia, que pode consultarse na seguinte ligazón:

<https://ficheiros-web.xunta.gal/transparencia/plans/antifraude/medio-ambiente/plan-augas-galicia-2024.pdf>

2. Augas de Galicia empregará como canle de denuncias o sistema posto en funcionamento, a disposición da cidadanía, a partir do 1 de xaneiro de 2022, no Sistema Integrado de Atención á Cidadanía (SIACI) ([https://www.xunta.gal/sistema-integrado-de-atencion-a-cidadania?langId=gl\\_ES](https://www.xunta.gal/sistema-integrado-de-atencion-a-cidadania?langId=gl_ES)), onde os cidadáns poden denunciar calquera irregularidades ou condutas de fraude. A presentación de denuncias nesta canle, que precisará da identificación electrónica da persoa denunciante para evitar suplantacións ou denuncias automatizadas, será tratada pola administración autonómica garantindo o anonimato da persoa denunciante, de xeito que os órganos que deban investigar a denuncia non coñezan a identidade do denunciante.



A canle, ademais da cidadanía, poderá ser utilizada polos empregados públicos para presentar medidas de mellora dos procedementos ou das accións antifraude. Tamén na canle poderanse denunciar incidencias que sexan realizadas por empresas ou por beneficiarios de subvencións.

No punto de acceso electrónico á canle de denuncias, situado en SIACI, figurará unha declaración da Xunta na que constará expresamente que, con independencia da necesaria identificación electrónica para a presentación da denuncia, os datos serán tratados anonimadamente mediante tecnoloxías de información para garantir a indemnidade da persoa denunciante e evitar calquera tipo de eventual represalia sobre ela, en termos semellantes aos establecidos na directiva europea.

A xestión da canle de denuncias corresponderá á Dirección Xeral de Simplificación Administrativa e do Patrimonio.

3. A investigación e tratamento das denuncias presentadas axustarase ao disposto nos puntos 2.3.2 e 2.3.3 do Plan Xeral de Prevención de Riscos de Xestión e Medidas Antifraude da Xunta de Galicia.

E para que así conste, en proba de conformidade coas cláusulas deste convenio, as partes asinan electronicamente este documento

*A presidenta de Augas de Galicia, Ángeles Vázquez Mejuto*

*O alcalde do Concello de Oroso, Alexander Doval Expósito*



*Anexo I. Detalle das achegas de Augas de Galicia conforme a desagregación dos gastos do proxecto*



## ANEXO I. DETALLE DAS ACHEGAS DE AUGAS DE GALICIA CONFORME A DESAGREGACIÓN DOS GASTOS DO PROXECTO

	PARTIDAS IMPUTABLES AS OBRAS DE ABASTECIMENTO E SANEAMENTO		RESTO DE OBRAS	TOTAL
	Achega de Augas de Galicia			
	Porcentaxe de cofinanciamento	Importe máximo		
Demolicións e actuacións previas	30,17%	20.525,08 €	47.500,92 €	68.026,00 €
Movemento de terras	89,92%	12.042,45 €	1.350,61 €	13.393,06 €
Firmes e pavimentos	6,79%	21.216,21 €	291.191,53 €	312.407,74 €
Pluviais	0,00%		11.692,30 €	11.692,30 €
Iluminación público	0,00%		31.383,32 €	31.383,32 €
Rede de saneamento	100,00%	66.745,62 €		66.745,62 €
Reposición de rede de abastecemento	100,00%	60.921,63 €		60.921,63 €
Xardinería e mobiliario urbano	0,00%		32.918,85 €	32.918,85 €
Marcas viales	0,00%		2.949,48 €	2.949,48 €
Sinalización vertical	0,00%		4.627,20 €	4.627,20 €
Xestión de residuos	50,00%	2.750 €	2.750 €	5.500,00 €
Seguridade e saúde	0,00%		5.300 €	5.300,00 €
Imprevistos	30,77%	2.000 €	4.500 €	6.500,00 €
6% Beneficio Industrial		11.172,06 €	26.169,85 €	37.341,91 €
13% Gastos Xerais		24.206,13 €	56.701,35 €	80.907,48 €
PBL s/IVE		221.579,18 €	519.035,41 €	740.614,59 €
IVE		46.531,62 €	108.997,44 €	155.529,06 €
PBL c/IVE		268.110,80 €	628.032,85 €	896.143,65 €

